

LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



L'ospital da Glion ha gi blier traffic aviatic

L'enviern passà en blers helicopters arrivads e partids da la plattform da l'ospital da Glion.

Pagina 7



Städtlilauf – atenziun, pront, via!

Il segund Städtlilauf a Glion è questa sonda. Var 430 participonts èn gia s'annunziads.

Pagina 7

FMR FUNDAZIUN
MEDIAS
RUMANTSCHAS

südostschweiz

ENGIADINA

Spettan tuots fin sün l'ultim mumaint?

Pel Premi Travers 2024 as po auncha inoltrer ün sböz per ün töch da teater fin la mited da quist mais. Scu cha l'Uniun Travers ho comunico la fin da l'eivna passada, nu do que però fin uossa auncha bgeras annunzhas per la concorrenza. Fin uossa sun que trais inoltraziuns. Perque s'ho l'Uniun Travers drizzeda aunch'üna vouta a las medias cun ün appel per render attent al Premi Travers. Il premi es doto cun 15 000 francs e dess esser üna contribuziun a l'ouvra. Que vuol dir cha fin a la data finela stu be gnir inoltro ün sböz dal töch, ün extract da text ed ün'idea. La geranta da l'Uniun Travers, *Gianna Olinda Cadonau*, ho in ün'intervista cun la FMR quinto davart la promoziun dal premi ed ho er do ün duos ispiraziuns scu cha's po listess auncha inoltrer ün töch fin la mited dal mais. (fmr/cam) **Pagina 11**

GRISCHUN

Di naziunal dals mulins



Resgias e mulins en 109 lieus en Svizra (qua la resgia da Disla) èn averts sonda proxima.

FOTO AUGUSTIN BEELI

Sonda proxima è en Svizra il di naziunal dals mulins. En 109 lieus pon ins visitar manaschis che elavureschan la granezza. Igl è la 24avla giada che l'Associaziun svizra dals amis dals mulins envida a quest di da las portas avertas. Ils implants datiers da flums ed auas funcziunan cun la forza da l'aua. En il Grischun pon ins visitar siat manaschis istorics, numnadamain ils suandants: Mulin vegl a Zorten, mulin da Masein en la Muntogna Dafora, lavuratori istoric da Schnaus da la famiglia Giger, il falun e chascharia Disla a Mustér, la «Rohrmühle Klosters, Mulin Mall a Sta. Maria/Val Müstair ed Il Mulino Aino San Carlo en il Puschlav. En tut ils lieus datti attracziuns, guidadas e demonstraziuns. Il mulin ha fatg part durant tschientaners da la cultura locala. Moler spelta, seghel, dumiec, salin ed autra granezza era ina lavur essenziala da e per la populaziun. En blers dals 109 lieus mussan las uniuns-purtadras era co che las resgias tiran a niz la forza da l'aua. (fmr/abc) **Pagina 5 e 12**

GRISCHUN CENTRAL

Ena gronda festa a Savognin

57 pluntanadas da murters, ena messa celebrada da dus spirituals, processiun – ed ena baselgia plagna. Chegl è stada la «Festa da la Sontga Crousch», tgi è gia li la dumengia passada an Surses. Igl è mintgamai egna dallas grondas festas tradiziunalas a Savognin. Tenor la legenda sa cumpona la crousch tgi vign purtada durant la processiun da tocca originala dalla crousch originala tgi er Jesus è purto. Chest onn è a madem taimp er igl Chor viril baselgia festivo igl sies 175avel anniversari ed anramo la messa cun cant festivo. (fmr/gns) **Pagina 9**

Puntreis vul salvar l'indipendenza

La casa da tgira Puntreis Center da sanadad SA dallas vischnauncas da Mustér, Tujetsch e Medel separticipescha buca alla Reit da sanadad Surselva. Pil president dalla fundaziun, Christoph Berger, dat ei neginas raschuns persuerter. Ils 25 da matg 2024 festivescha l'instituziun il giubileum da diesch onns.

HANS HUONDER/FMR

Avon diesch onns ein las vischnauncas da Mustér, Tujetsch e Medel sedecididas da dar a lur casa da tgira Puntreis ina fuorma cun ina fundaziun sco purtadra ed ina societad acziunara sco menadra operativa. «Oz constatein nus che las vischnauncas han eligiü persuerter ina fetg buna fuorma. Ella ei secumprovada cumpleinamein», di *Christoph Berger* che presidescha la Fundaziun Puntreis. Ils 55 letgs ein occupai e las 65 plazzas cumpleinas repartan 90 colla-

«Nus da Puntreis vesin neginas raschuns da separticipar alla Reit da sanadad Surselva.»

Christoph Berger,
president dalla Fundaziun Puntreis

boraturas e collaboraturas. Che Puntreis sa occupar il mument tuttas plazzas da lavur ha pliras raschuns. Bein sin combas stat l'instituziun era pertuccont la situaziun finanziaria. Per quei motiv di Christoph Berger lu era: «Nus da Puntreis vesin neginas raschuns da separticipar alla Reit da sanadad Surselva.» L'indipendenza garantesch alla casa da prender decisiuns a moda sperta, leutier sappien tuttas plazzas da lavur – era quellas dall'administraziun – vegnir mantenidas ella region.

Pagina 5

«Jau hai gugent d'era survegnir in puschel fluras durant l'onn.»

Ina mamma che discurra probablamain per bleras. – Pagina 3



FOTO GABRIELA RIEDI

Stima durant l'entir onn fiss bel

Nagin dubi: bleras mammas han plaschair sch'ellas survegnan in regalin u ina flura per il di da la mamma. Dentant giavischassan era bleras dapli stima e respect envers la lavur da chasa ed il sustegn emoziunal dals uffants, e quai durant l'entir onn. U sco che la redactura *Claudia Cadruvi* scriva en sia columna: «Jau giavisch per tuttas mammas futuras ch'i giaja svelto e che nosa societad cuntanschia prest che babs e mammas pon parter guliv la lavur da famiglia.» (fmr/opm) **Pagina 3**



30019



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004

«La fuorma eligida avon 10 onns ei secumprovada»

La Fundaziun Puntreis sa festivar uonn il giubileum da 10 onns. Quei fa ella sonda, ils 25 da matg 2024. Per la FMR tila il president dalla fundaziun, *Christoph Berger*, bilanza da quei em-prem decenni d'existenza d'ina impurtonta instituziun per las treis vischnauncas da Mustér, Tujetsch e Medel. El constatescha: «La fuorma d'ina fundaziun sco purtadra d'ina societad acziunara ei secumprovada.» Ton finanziamein sco persunalmein stat Puntreis bein. Per quei motiv ei ina participaziun alla Reit da sanadad Surselva lu era negin tema il mument.

HANS HUONDER/FMR

La historia dallas casas da paupers, vegls e tgira dallas treis vischnauncas ei liunga ed interessanta enina. Mustér, Tujetsch e Medel possedeavan tuttas ina tala instituziun pli baul. A Mustér entscheiva la historia dalla casa da vegls ed attempai igl onn 1852 culla fundaziun dalla «Casa pauperila». Quella era vegnida scaffida per esser il da casa per affons illegitims ed orfans, gliud veglia ed attempada, paupers ed impedi, persunas malsaunas e cun basegns da tgira ni era pensiunaris.

«L'infrastructura s'auda alla fundaziun ed ella procura las investiziuns.»

Christoph Berger,
president Puntreis

Engrondu e modernisau

Sin fundament dallas directivas dil cantun ein las casas da vegls – sco ellas vegnevan numnadas pli baul – sesviluppadas ils davos decenni spirontamein a casas da tgira. La fin finala ha ei lu era dau ina reuniun da quellas da Sursassiala en fuorma d'ina suletta casa a Mustér. Igl atun 2009 han las vischnauncas da Mustér, Tujetsch e Medel acceptau ina cunvegientscha da cooperaziun per ina tgira

staziunara e parzial-stagiunara, sco era per la tgira da pazients a liunga vesta e persunas attempadas. La fin october 2009 ha la Fundaziun Casa da tgira Sursassiala allura decidiu d'engrondir la casa existenta a Mustér e da porscher leu igl avegnir 55 letgs da tgira. 1951 era la Casa sogn Gions vegnida erigida e 1994/95 engrondida sco Casa da tgira Sursassiala. Suenter che la casa nova Puntreis ei vegnida en funcziun, ein las casas da vegls e da tgira Tgasa Sontgaclau a Curaglia e Tgesa s. Vigeli a Sedrun vegnidadas.

Nova structura

Parallelmein culla construcziun dalla casa da tgira ein las vischnauncas sefatschentadas intensivamein dalla fuorma futura dil purtader. «Las vischnauncas han lu scaffiu ina fundaziun sco purtadra e lezza ha fundau ina societad acziunara pil menaschi operativ. Oz constatein nus che las vischnauncas han eligi persunter ina fetg buna fuorma. Ella ei secumprovada cumpleinamein», di *Christoph Berger* che presidescha la Fundaziun Puntreis. La fundaziun e la Puntreis Center da sanadad SA coopereschan stregamein, las incumbensas dad omisus gremis ein regladas claramein. «L'infrastructura s'auda alla fundaziun ed ella procura las investiziuns. La societad acziunara ei responsabla pil menaschi operativ e paga in tscheins pil baghetg alla fundaziun. Leutier profitescha la fundaziun d'in eventual gudogn dil menaschi. En mintga cass caschunein nus negins deficits allas vischnauncas», constatescha *Christoph Berger*. Meinfatschenta dalla fundaziun e dalla societad acziunara ei *Gian-Reto Nufer*, president dil cussegl d'administraziun dalla societad acziunara ei *André Schmid*. Tenor *Christoph*



Christoph Berger presidescha il cussegl da fundaziun da Puntreis. El ei fetg cuntents co il menaschi funcziuna il mument.

FOTO HANS HUONDER

«La gronda part dil persunal plaidera era romontsch.»

Christoph Berger,
president Puntreis

Berger ha la fundaziun il mument in deivet da rodund nov milliuns francs. Quei deivet ha saviu vegnir reducius successivamein ils davos onns. Las vischnauncas ein representadas ton el cussegl da fundaziun sco el cussegl d'administraziun dalla societad acziunara cun tuttinas biaras commembras ni commembers.

Menaschi funcziuna fetg bein

«Nus havein in'occupaziun cumpleina da tuts 55 letgs ed era pertuccont il persunal essan nus en ina fetg buna situaziun», di *Christoph Berger*. Puntreis occupa 90 persunas che partan in pensum total da 65,2 plazzas da lavur cumpleinas. Tuttas plazzas da lavur seigien occupadas, inclusiv substituziuns da tuttias funcziuns: «La gronda part dil persunal

plaidera era romontsch, quei ch'ei era fetg impurtont tenor nies manegiar.» Che la casa dispona il mument d'avunda persunal ha tenor *Christoph Berger* plirs motivs: «Las persunas cun funcziuns da diriger han in bien maun da menar persunal. Nus havein denton era adattau las pagas e purschin pusseivladadas da formaziun. Tut quellas componentas fan atractiva la lavur tier nus.» Tonaton constatescha *Christoph Berger* era, ch'igl ei grev surtut d'animar la giuventetgna da luvrar en funcziuns da tgira.

Collaboraziun cul Da Casa

Ensemen cul Da Casa Val Lumnezia a Vella vul Puntreis collaborar igl avegnir pli stretg, denter auter pertuccont collaboraturas e collaboratur. «Puntreis e Da Casa separticipeschan buca alla Reit da sanadad Surselva. Nus da Puntreis vesin neginas raschuns d'esser leu dalla partida seigi pertuccont fatgs finanzials sco persunals», di *Christoph Berger* e puntuescha: «Nies menaschi funcziuna, era grazia a vias cuortas da decider. Cun restar independents savein nus mantener tuttias plazzas cheu tier nus, era quellas dall'administraziun. Aschia havein nus era igl avegnir ina structura surveseivla e savein decider sezs cu e co investir.» Il president dalla fundaziun ei optimists pigl avegnir, di denton era: «Il svilup demografic ei difficils cheu tier nus. La populaziun se-reducescha, mo il diember da persunas veglias crescha. Tutta dat ei a liunga vesta numericamein dameins persunas cun basegns da tgira.»

Il giubileum da 10 onns da Puntreis vegn festivaus sonda, ils 25 da matg 2024 dallas 10.30 entochen las 16.00. Sper in program da divertiment e la pusseivladada da prender investa dalla casa, vegn era purschii in act festiv cun plaid allas 13.35.

Cu l'aua dat giu silla roda-mulin

Dapi 2005 dat ei ina gada ad onn a Disla ina «perdanonza» profana. Sonda proxima separticipescha l'Uniu culturala Disla puspei al di svizzer dils mulins. Tschien persunas vegnan a visitar il vitg industrial cun ses baghetgs historics.

AUGUSTIN BEELI/FMR

Ella truaisch ha l'Uniu culturala Disla sia sedia. En ina vitrina vid la preit vesan ins la trofea e la purgameina dil Premi Desertina 2024. Il schaner ha la vischnaunca da Mustér undrau l'uniu vitala ed activa cun quei premi da promozion. Ora el liber, da tschella vart dalla via dil vitg, cuora l'aua silla canal viers la roda-mulin dalla resgia. Il december 1990 ha ina gruppa d'iniziant cun *Meinrad Giger*, *Martin* e *Giusep Lutz* e *Giusep Bigliel* clamau ils possessurs da dretgs vid il fallun e dalla cascharia ad ina radunonza extraordinaria. Igl ei stau il signal da partenza dall'uniu fallun e cascharia Disla/Mustér. 16 possessurs han fundau l'uniu e 34 onns pli tard dumbrava quella 120 commembers. Il Premi Desertina ha il president communal da Mustér *René Epp* surdau al president dall'Uniu culturala Disla. Gl'onn vargaa ha l'uniu midau sin quei num niev. «Demai che nus s'engaschein buca mo pil fallun e la cascharia, mobein era pil mulin e la resgia», puntuescha il president *Valentin Bisquolm*.

Las crestgas, il «rumien»

En mintga vitg deva ei pli baul tals menaschis artisanal-industrial: in mulin, ina resgia, forsa era aunc ina pella. Ins targeva a néz la forza dall'aua per rumper il garnei e producir frina. Ni ieli, cun smaccar ella pella il sem-glin. Per



Valentin Bisquolm ha aviert il begl nua che la frina mulada croda el caum.

baghegiar casas, clavaus e mobilia han ins resgiau aissas – era culla forza digl ual ni dutg. Aschia ha la mecanisaziun entschiet.

Quels process da lavur presenta l'Uniu culturala Disla puspei alla populaziun. «Mulin, truaisch e tschels locals ein aviarts sonda proxima», renda *Valentin Bisquolm* attent el discuors culla FMR. Ils 11 da matg 2024 ei il di nazional dils mulins. Disla ei in da 109 lohghens en Svizra che arvan las portas. Sco ils onns vargai, vegnan persunas interes-

sadas a visitar il vitget e ses baghetgs industrial. Ellas san mirar co ins producescha crestgas, ch'ei atgnamein il «rumien» dalla frina. *Valentin Bisquolm* e sia squadra muossan, informeschan, surveschan e segidan.

Il dutg da s. Lezi, il protagonist

Pign e grond san mirar e s'informar co ins fa la materia prima per nies paun da mintga di, co las molas-crap molan il garnei da dumie, segal ni triedi. Ins



Il mulin sesanfla el plaun sut dalla casa giudem il vitg da Disla.

FOTOS AUGUSTIN BEELI

vegn a veser co il product raffinau, la frina alva, croda en in truchet, las crestgas en in auter. «Crestgas ein era tschercadas oz», puntuescha il «muliner» da Disla. Quei product ei apprezzau pil nutriment saun.

Sonda proxima vegnan rodund 20 persunas dall'uniu ad esser en acziun sco gidonters e guides. Ina rolla principala ha enzatgei auter al di dils mulins a Disla: «Nies dutg da sogn Lezi», di *Valentin Bisquolm*. Ella truaisch, ina specia da hetta, magazin ni arcun, muossa el ina

fotografia dil vitg cul dutg che nescha sur la caplutta. Quell'aua survescha all'industria da Disla ch'ins sa admirar sonda proxima.

Il di dallas portas aviartas els baghetgs historics a Disla ei sonda, ils 11 da matg 2024 dallas 10.00 tochen las 17.00. Era la famiglia Giger a Schnaus, possessura dil mulin e luvratori mecanic leu, separticipescha al di svizzer dils mulins. Leu ein ils implants en funcziun e la famiglia envida medemamein dallas 10.00 tochen las 17.00 alla viseta.